

四庫全書

集部

欽定四庫全書

集部  
聲畫集卷三  
四

詳校官庶吉士<sub>臣</sub>柳邁祖

助教<sub>臣</sub>常循覆勘

總校官庶吉士<sub>臣</sub>朱鈐

校對官中書<sub>臣</sub>李斯咏

謄錄監生<sub>臣</sub>朱坦

欽定四庫全書

聲畫集卷三

宋 孫紹遠 編

贈寫真者

贈寫真者 白樂天

子騁丹青曰予當醜老時無勞役神思更畫病容儀迢  
遞麒麟閣圖功未有期區區尺素上焉用寫真為

贈寫御容妙善師 蘇子瞻

憶昔射策干先皇，珠簾翠幄分兩廂。紫衣中使下傳詔，  
跪奉冉冉聞天香。仰觀眩晃目生暈，但見曉色開扶桑。  
迎陽晚出步就坐，絳紗玉斧光照廊。野人不識日月角，  
髣髴尚記重瞳光。三年歸來真一夢，橋山松檜淒風霜。  
天容玉色誰敢畫，老師古寺晝閉房。夢中神授心有得，  
覺來信手筆已忘。幅巾常服儼不動，孤臣入門涕自滂。  
元老侑坐鬚眉古，虎臣侍立冠劍長。平生慣寫龍鳳質，  
肯顧草間獮與麀。都人踏破鐵門限，黃金白壁空堆牀。

爾來摹寫亦到我為是先帝白髮郎不須覽鏡坐自了  
明年乞身歸故鄉

贈寫真何充秀才

君不見潞州別駕眼如電左手挂弓橫撚箭又不見雪  
中騎驢孟浩然皺眉吟詩肩聳山饑寒富貴兩安在空  
有遺像留人間此身常擬同外物浮雲變化無蹤迹問  
君何苦寫我真君言好之聊自適黃冠野服山家容意  
欲置我山巖中勲名將相今何限往寫褒公與鄂公

贈李道士 并序

駕部員外郎李君宗固景祐中良吏也守漢州有道士尹可元精練善畫以遺火得罪當死君緩其獄會赦獲免時可元八十一自誓且死必為李氏子以報可元既死二十餘年而君子世昌之婦夢可元入其室生子曰得柔小名蜀孫幼而善畫既長讀莊老喜之遂為道士賜號妙應事母以孝謹聞其寫真蓋妙絕一時云

世人只數曹將軍誰知虎頭非癡人腰間大羽何足道  
頰上三毛自有神平生狎侮諸公子戲著幼輿岩石裏  
故教世世作黃冠布襪青鞋弄雲水千年鼻祖守關門  
一念還為李耳孫香火舊緣何日盡丹青餘習至今存  
五十之年初過二衰顏記我今如此他時要指集賢人  
知是香山老居士

樂天為翰林學士  
奉詔寫真集賢院

贈寫真李道士

蘇子由

君不見景靈大殿圖功臣進賢大羽東西陳能令將相

常在世自古獨有曹將軍高高李師掉頭笑自言弄筆  
通前身百年遺像誰復識滿朝冠劍多偉人據鞍一見  
心有得臨窗相對疑通神十年江海鬚半脫歸來俛仰  
慙簪紳一揮七尺倚牆立客來顧我誠似君金章紫綬  
本非有綠蓑黃犢甘長貧如何畫作白衣老置之茅屋  
全吾真

張秀才見寫陋容

潦倒形骸山上樗每經風雨輒凋疎勞君為寫支離狀



異日長看老病初落筆縱橫中自喜賦形深穩妙無餘  
偶然挂壁低頭笑俱幻何妨彼亦如

客有寫真者見予因以三詩贈之李誠之

嗟予少也賤到老尚無功方寸浮名外流年兩鬢中對  
鏡猶慚愧圖寫若為容

文命力能平水土阿衡功亦格皇天形容不上麒麟閣  
當日君臣任自然

難逢古鑑明忠腹長似騷人帶病容幾向清溪曾照見

萬尋巖壑一青松

贈傳神大師 黃裳

闕下遊多日溪邊過幾春  
數圖人欲活一筆自如神  
不寫俗中態謾留雲外身  
丹青如貌我道貌似山人

贈金陵傳神者李士雲

王介甫

衰容一見便疑真  
李氏揮毫妙入神  
欲去鍾山終不忍  
謝渠分我死前身

風雲雪月

省試觀慶雲圖

柳子厚

設色初成象，卿雲示國都。  
九天開秘祉，百辟贊嘉謨。  
抱日依龍袞，非煙近御爐。  
高標連汗漫，回望接虛無。  
裂素榮光發，舒華瑞色敷。  
恒將配堯德，垂慶代河圖。

吳熙老所藏風雨圖

潘邠老

我遊匡山夏，將杪赤日青天。  
萬山遶，忽然風雨動地來。  
震氣乘雷離，電繞一川煙靄。  
失東西，萬里乾坤錯昏曉。  
香爐高峰危欲墮，石門細路人。  
心勦江翻，那聞得計魚

木拔豈有安巢鳥須臾雲過雨脚收依舊晴暉著叢篠  
羣山歷歷在眼前恰似憑高日方曉誰將此景入畫圖  
數幅生綃盤礴了吳丞此畫絕代無張公此詩古來少  
讀詩觀畫興未窮北窗風涼退自公使君意消三伏中  
未可鞭箠催青銅

熙老在羅田催科  
不用鞭箠而辦

江月圖

崔德符

冥冥一葉輕不知水與天獨于顚氣中仰見素壁圓超  
然狂道士起視清夜闌自拈白玉笛吹此江月寒想當

萬籟息逸响流空煙我從江海來形留意先還何當買  
漁篷追此水墨仙

王氏雪圖 王介甫

崔嵬相映雪重重茅屋柴關在半峰想有幽人遺世事  
獨臨青峭倚長筇

題王維江行初雪畫 蔡持正

吳兒龜手網寒川急雪鳴蓑浪拍船青弋渡頭曾卧看  
令人却憶十年前

跋趙朝議江行初雪圖

守中志源

陳子高

我本孤舟蓑笠翁  
雪崖煙樹一生中  
如今不向江湖去  
鬪艦旌旗照水紅

雪岫圖

大年貌得寒江雪  
鳬雁沙頭野  
杓微箇裏有詩誰會得  
情知不道一蓑歸

州郡山川

嚴公廳宴同詠蜀道畫圖

得空字

杜子美

日臨公館靜晝列地圖雄劒閣星橋北松州雪嶺東華  
夷山不斷吳蜀水相通興與煙霞會清尊幸不空

奉觀嚴鄭公廳事岷山沱江畫圖

得忘字

沱水臨中座岷山到北堂白波吹粉壁青嶂插雕梁直  
訝杉松冷蕪疑菱苒香雪雲虛點綴沙草得微茫嶺雁  
隨毫末川蜺飲練光霏紅洲葢亂拂黛石蘿長暗谷非  
關雨丹楓不為霜秋成玄圃外景物洞庭旁繪事功殊  
絕幽襟興激昂從來謝太傅丘壑道難忘



王處士草堂壁畫衡霍諸山

劉長卿

愛此衡霍近卷簾如可扳能令堂上客見盡湘南山青  
翠千萬狀飛來方丈間歸雲無處滅去鳥何時還勝事  
日相對主人常獨閒清陰滿四壁佳氣生重關頗與宿  
心會看看慰愁顏

題劉相公三湘圖

郎士元

昔別醉衡霍爾來憶南州今朝平津邸兼得瀟湘遊稍  
辨荆門樹依然芳杜洲微明三巴峽咫尺萬里流去鳥



不知倦遠帆生暮愁  
涪陽指天末北渚空  
悠悠枕上見  
漁父座中常狎鷗  
誰言魏闕下自有東山幽

荅白杭州郡樓登望畫圖見寄

張文昌

畫得江城登望處  
寄來今日到長安  
乍驚物色從詩出  
更想工人下手難  
將展畫堂偏覺好  
每來朝客盡求看  
見君向此閒吟意  
肯恨當時作外官

次韻周邠寄雁蕩山圖二首

蘇子瞻

指點先憑采藥翁  
丹青化出大槐宮  
眼明小閣浮煙翠

齒冷新詩嚼雪風二華行觀雄陝右九仙今已壓京東  
此生的有尋山分已覺溫台落手中

西湖三載與君同馬入塵埃鶴入籠東海獨來看出日  
石橋先去踏長虹遙知別後添華髮時向尊前說病翁  
所恨蜀山君未見他年攜手醉鄆筒

宋復古畫瀟湘晚景圖三首

西征憶南國堂上畫瀟湘照眼雲山出浮天野水長舊  
游心自省信手筆都忘曾有衡陽客來看意渺茫

落落君懷抱山川自屈蟠經營自有適揮灑不應難江  
市人家少煙村古木攢知君有幽意細細為尋看  
咫尺殊非少陰晴自不齊徑遙趨後崦水會赴前溪自  
說非人意曾經入馬蹄他年宦遊處應話劍山西

虔州八境圖八首

坐看奔湍遶石樓使君高會百無憂三犀竊鄙秦太守  
八詠聊同沈隱侯

濤頭寂寞打城還章貢臺前暮靄寒倦客登臨無限思

孤雲落日是長安

白鵲樓前翠作堆  
縈雲嶺路若為開  
故人應在千山外  
不寄梅花遠信來

朱樓深處日微明  
阜蓋歸時酒半醒  
薄暮漁樵人去盡  
碧溪青嶂遶螺亭

使君那暇日叅禪  
一望叢林一悵然  
成佛莫教靈運後  
著鞭從使祖生先

却從塵外望塵中  
無限樓臺煙雨濛  
山水照人迷向背

只將孤塔認西東

煙雲縹緲鬱孤臺積翠浮空雨半開想見之罍觀海市  
絳宮明滅是蓬萊

回峰亂嶂鬱參差雲外高人世得知誰向空山弄明月  
山中木客解吟詩

蹇師嵩山圖

并引

蘇子由

葆光法師蹇君未嘗至嵩山欲往游焉元祐九年  
春磐桓都下得古畫一幅以示其客客曰此嵩山

圖也予昔嘗遊焉峰嶺徑邃觀刹皆是君喜曰此  
將以導予也吾昔熙寧中自陳之洛往來皆出嵩  
少之間時方重九與偕行者約曰與子於此登高  
乎令筋力尚強可以一往異日復至或不能矣今  
年三月以罪出守汝州聞此州在嵩少之陽登城  
北望可以盡得其勝君何時為此遊吾將舉酒與  
子相望雖不能同亦庶幾焉系之以詩曰

峻極登高二十年汝州回望一依然君行亦是高秋後

試覓神清古洞天

孫少卿鹿頭山詩并畫圖二首

頤景修

劉莘老

誅茅搜險旋尋真聞說仙巖一日新佳境留連應有待  
先時登覽豈無人披榛好石來如召隨手清泉應若神  
不獨山中興勝事幾多風愛在邦民

使君真愛鹿頭山圖畫歌吟去為傳塵世那知武陵事  
時人爭誦永嘉篇行春游醉嘗勞夢按部登臨又隔年  
有客平生志林壑坐憐雙眼隔雲煙

陝西圖三首

劉叔輿

千戈今日事關塞此圖看白日長安近蒼山墮坂寒由  
來名百二自古有艱難指以安西道疑情竟據鞍

萬里靈州地他年漢朔方山河從割棄關輔急隄防轉  
益豺狼窟堪嗟禮義鄉拔胡須壯士看盡意蒼茫

河源來積石天馬涉流沙耳目成千古丹青在一涯荒  
涼都護府斷絕使臣槎安得山西將收功似漢家

幽州圖



鄙夫平居常歎息薊門幽都皆絕域安得猛士守北方  
力排胡人復禹跡田生手攜朔漠圖丹青萬里之強胡  
挂圖高堂素壁上壯哉陰山來坐隅長安迢迢屬滄海  
古塞歷歷生黃榆縱橫指顧皆舊物撫事慷慨時驚呼  
太平壯士多虛死念君避胡來萬里九關沈深虎豹惡  
布衣何由說天子卷圖還君意黯然咄嗟世事非余耻

王摩詰曲江春游圖

李方叔

咸雍山川互王霸涇渭為隍城塹華曲江臺沼備豫游

祇與畫師供入畫長安城西山萬重昆明煙浪繞新宮  
新蒲細柳春風裏萬戶千門佳氣中我生不及開元時  
猶喜此圖今見之蒼莽煙綃橫短幅眼中終南倒溪淥  
傾城士女巷無人三月三時曲江曲老稚妍媸賤或貴  
來者攜壺歸者醉筆端造化有能事各有人人樂游意  
如今此地空塵跡石鯨縱在如銅狄宜春五柞更蕭條  
無復榛中得遺甃我願吾王明六符不蹈漢唐耳目娛  
池籩假民任畋漁無令畫師為畫圖

劉帥畫道林冬景

王佐才

破墨方紈趣向深，煙嵐幽景鎖冬陰。  
溪頭雪細春生牖，巖脚風清晝滿襟。  
千里斷雲藏片石，一江流水映疎林。  
長沙妙跡誰傳寶，龍閣精神學士心。

潭帥劉公為鄧慎思寫道林冬景

七言和王微之漁陽圖

沈文通

燕山自是漢家地，北望分明掌股間。  
休作畫圖張屋壁，空令壯士老朱顏。

贈張聖言畫柯山圖

潘邠老

我昔騎鯨游九州上扣天關望冕旒羣公侍旁好顏色  
將順帝旨成剛柔抱持日月不自獻蒙茸塵土歸家丘  
結茅竹間令休已炎暑避舍清飈留屋頭清溪鳴晝夜  
當戶古木蔽馬牛蒼頭盧兒從高蓋傳呼不到門巷幽  
兩公忘言兒袖手驅除睡魔須茶甌誰傳此意到旁郡  
解衣盤礴煩張侯張侯落筆妙天下未墜學士之風流  
歛見柯山入圖畫丹青知君百不憂黃公不肯直南省  
一麾已具東南舟請君援筆待公至畫我迎公竹陰裏

次韻錢遜叔清江圖後二首 呂居仁

公但一室堅坐我方萬里生還共作十年清夢同尋五  
嶺名山

作清江三兩曲勝大廈千萬間若保此中安坐不必中  
原遽還

題向伯共過峽圖二首 陳去非

旌旗翻月淮南道興罷歸來雪一船正有佛光無處著  
獨將佳句了山川

過峽新圖世所傳  
峽中猶說泛舟仙  
柱天勲業須君了  
借我茅齋看十年

江南山色

陳子高

筆間煙雨謾愁人  
不是溪山自在春  
一段江南好風景  
夕陽花塢淨無塵

題申居士雪溪圖

韓子蒼

雪溪居士買山圖  
碧玉峯前碧玉湖  
中有一丘容我老  
暮年居士肯分無

題張資政汝川圖九首

汪彥章

昔人曾此結精廬故老猶傳井臼餘  
今代子房來卜築要看圮上一編書

右澹巖書堂

古潭千尺見修鱗倚杖時觀鏡裏身  
汝輩只堪箋爾雅騎鯨那識謫仙人

右泊湖潭

發揮泉石有新圖西蜀墓頤得爾無  
暫作釣璜溪上客



谿神何必問賢愚

右蝦蟇石

每尋疎磬訪支郎  
苔竹交陰杖屨旁  
絲履氎巾聊取用  
風流不減贊公房

右多寶院

花光連接兩臺春  
中有眠雲跂石人  
莫使鞭笞鸞鳳去  
時來重現宰官身

右金石臺



年年春色報公知不與天涯驛使期我是平章風物主  
可如東閣見君時

右梅仙潭

履綦行處日蒼苔  
顰幌深藏月一開  
已辨此身同法喜  
不應臨感更難裁

右懷賢菴

上到孤峰最上頭  
下看雙澗玉虹流  
世間培塿何須數  
且卧元龍百尺樓

右積翠樓

蕭散香山與輞川功名綠野及平泉有田種秫供春醉  
五柳先生似更賢

右甘陂莊

浯溪圖 黃山谷

成子寫浯溪下筆便造極空濛得真趣膚寸已千尺只  
今中宮寺在昔漫郎宅更作老夫船檣竿插蒼石

跋浯溪造極圖 折中古

浯溪未到已登臨  
筆力能窮造化心  
我是零陵新逐客  
披圖一一可追尋

題湖南清絕圖

韓子蒼

故人來從天柱峯  
手提石廩與祝融  
兩山坡陀幾百里  
安得置之行李中  
下有瀟湘水清寫  
平沙側岫搖青風  
漁舟已入浦溆宿  
客帆日暮猶爭風  
我方騎馬大梁下  
怪此物象不與常  
時同故人謂我乃  
絹素粉墨妙手煩  
良工都將湖南萬  
古愁與我頃刻開  
心胸詩成畫往嘿

惆悵老眼復厭京塵紅

跋湘西清絕圖

折中古

與山分淺政傷神蠟屐明朝陌上塵誰寫湘西清絕景  
巧移林壑慰行人

題瀟湘圖

孫仲益

平生千里目遙寓紫翠間見此紙上影照我胸中山泛  
泛水俱遠悠悠雲共閒漁翁收晚釣一櫂醉中還

五士遊岳麓圖

張敬夫

閉門六月汗如雨出門襟襪紛塵土文書堆案曲肱臥  
夢逐征鴻過前浦西山突兀不可忘勇往故須求快睹  
朝暾未升起微風中流咿啞挾鳴櫓長林秀色已在望  
有如出語見肝腑意行愛此松陰直眼明還喜碑字古  
高低梵釋著幽居深穩仙家開闕宇忽看宮牆高十丈  
學宮莪莪起鄒魯斯文政倚講磨功石室重新豈無補  
危梯徑上不作難橫欄截出可下俯惟茲翼軫一都會  
往事繁華雜歌舞變遷反覆寧重論昔日樓臺連宿莽

通來人物頗還舊豈止十年此生聚泉流涓涓日循除  
華表何時鶴來語炎氛知不到山林茗盃蒲團對香縷  
鼎來杖履皆勝引季也亦復同步武洛陽年少空白頭  
三閭大夫浪自苦一笑便覺真理存高談豈畏丞卿怒  
不圖畫僧聖得知貌與兒曹作夸詡請君為我添草堂  
風雨蕭蕭守環堵

題王介甫遊鍾山圖後

林影溪光靜自如蕭疎短鬢獨騎驢可能胸次都無事

擬向山中更著書

宋迪作八景絕妙人謂之無聲詩演上人戲余  
道人能作有聲畫乎因為之各賦一首

僧慧洪

瀟湘夜雨

岳麓軒窗方在目雲生忽收畫圖軸逆風為作白頭波  
倒帆斷岸漁村宿燈火荻叢營夜炊波心應作出魚兒  
絕憐清境平生事遂漏孤吟曉不知

洞庭秋月

橘香浦浦青黃出維舟日暮柴荆側勇波好月如佳人  
矜誇似弄嬋娟色夜深河漢正無雲風高掠水白紛紛  
五更何處吹畫角披衣起看低金盆

平沙落雁

湖容秋色磨青銅夕陽沙白光濛濛翩翩欲下更嘔軋  
十十五五依蘆叢西興未歸愁欲老日暮無雲天似掃  
一聲漁笛忽驚飛羲之書空作行草

遠浦歸帆



東風忽作羊角轉坐看波面纖羅卷日角明邊白鳥飛  
江勢吞空客帆遠凭欄心緒風絲亂蒼茫初見疑鳬雁  
漸見桅檣隱映來此時增損憑詩眼

山市清嵐

宿雨初收山氣重炊煙日影林光動蠶市纔休人已希  
野橋柳色金絲弄隔溪誰家花滿畦滑唇黃鳥春風啼  
酒旗依約望可見知在柘岡村路西

江天暮雪

潑墨雲濃歸鳥滅魂清忽作江天雪一川秀色浩零亂  
萬樹無聲寒妥貼孤舟卧聽打窗扉起看宵晴月正暉  
忽驚盡卷青山去更覺重攜春色歸

烟寺晚鐘

十年車馬黃塵路歲晚客心紛萬緒猛省一聲何處鐘  
寺在烟村最深處亂溪水急風更清扁舟欲喚無人渡  
倚筇無語立西風歸僧自入烟蘿去

漁村落照

蘆葦蕭蕭風浙瀝村巷秋光潑殘日屋頭炊黍香浮浮  
門前登網銀刀戢筠籬滿盛柳條串隔岸人家酒醇醪  
移舟盡傾博一醉卧看山川紅綠眩

題顏持約畫四小景

王履道

梧山暮雪

一白空迷浩渺萬蒼却立孱顏北渚曾逢帝子南巡更

憶虞鰈

荔浦夕陰

曾向荔支浦宿林紅間碧猶疑老矣少文欲卧咄哉王  
贊何知

桂嶺秋晴

海市當寒可出嶽雲正雨猶開故捲黃茅瘴盡為飛碧  
玉簪來

梅村欲曉

暗射霏霏逆鼻荒雞喔喔號村萬里客行慄慄玉顏破  
霧相溫

題陽華巖圖

元子說陽華巖巖下可家此招吾已諾不恨客天涯

題陳去非王摩詰嘉陵圖

江山已暗大同殿弦管猶喧凝碧池別寫嘉陵三百里  
右丞心事欲誰知

初陽成逸畫浯溪圖相示為作長句

少文閱世老不出自畫雲山滿牆壁澄懷觀道追所歷  
坐覺琴聲隱金石我亦七年湖外客夢中猶泛湘江碧

浯溪之圖喜新得身卧嶺南心嶺北憶嘗留語溪邊僧  
異時人讀唐中興說與此乃秦典刑三句入韻之果銘  
今欲復作誰可令似有元結無真卿風煙慘淡萬古情  
不如且尋畫隱成

四時

題惠崇畫四首

東風回江上渚何處來雙白鷺灼灼岸間桃依稀蘭杜  
苗一銜湍瀨鱗一下青林梢瀟湘綠水春迢迢春

老柳無嘉色紅渠羞脉脉宛在水中洲雙鵝羽蒼白何  
須玩引頸顛倒寫經墨惟應一臨流當暑袵締綌夏

一雁孤風乍臨渚兩雁將飛未成舉三雁羣行依宿莽  
蘆花已倒江上風雲間分飛那可同秋

天高靄靄雲昏江濶霏霏雪繁渚下鴨方遠泛枝間雀  
不聞喧鄙夫此志相依生涯稊稗同微欲具沙邊短艇  
波濤歲晚人稀冬

題張聖言畫四時景物

潘邠老

我到淮南幾見春  
一身蓑笠蔽煙雨  
桃花林裏有人家  
疑是柯山最深處

成陰衆木與天叅  
日暮風雨地軸翻  
曾向廬山問行李  
石門西路接僧垣

荻花索索水津津  
日落空山開霽新  
松下有人摩詰似  
與渠煙火作比隣

雲蒙山頭雪翻空  
飛鳥遶樹困號風  
關山淮水失微路  
酒壚曾借衰顏紅



題陳德秀畫四季枕屏圖五首

亂山深處碧波流，隔岸垂楊廢小舟。  
無數桃花伴春夢，夢中還作武陵遊。

茅簷竹閣枕回溪，柳外平橋拍水低。  
在藻白魚知鷺下，穿林黃雀覺蟬嘶。

錦樹連雲爛不收，山河風景一番秋。  
老夫枕簟便涼夜，不比新亭去國愁。

江樹溟濛雪暗天，似聞寒雁破昏煙。  
相思此夜堪乘興，

試問漁翁覓釣船

好景入詩皆可畫  
未如陳子畫中詩  
疑公便是褚季野  
政爾不言行四時

惠崇春江晚景二首

蘇子瞻

竹外桃花三兩枝  
春江水暖鴨先知  
蒹葭滿地蘆芽短  
正是河豚欲上時

兩兩歸鴻欲破羣  
依依還似北歸人  
遙知朔漠多風雪  
更待江南半月春

次韻秦少游春江秋野圖二首

宗室所畫

陳無已

翰墨功名裏江山富貴人  
條看雙鳥下已負百年身  
江清風偃木霜落雁橫空  
若箇丹青裏猶須著此翁

題江南春曉圖

汪彥章

忽從林杪見朝暉  
釋嶠輕雲半欲飛  
何惜扁舟并畫我  
要從海際望春歸

書李世南所畫秋景二首

蘇子瞻

野水參差落漲痕  
疎林敲倒出霜根  
扁舟一櫂歸何處

家在江南黃葉村

人間斤斧日創夷誰見龍蛇百尺姿  
不是溪山曾獨往何人解作挂猿枝

郭熙秋山平遠二首

目盡孤鴻落照邊遙知風雨不同川  
此間有句無人識送與襄陽孟浩然

木落騷人已怨秋不堪平遠發詩愁  
要看萬壑爭流處他日終須顧虎頭

郭熙畫秋山平遠

玉堂畫掩春日閒中有郭熙畫春山鳴鳩乳燕初睡起  
白波青嶂非人間離離短幅開平遠漠漠疎林寄秋晚  
恰似江南送客時中流回頭望雲巘伊川佚老鬢如霜  
卧看秋山思洛陽為君紙尾作行草炯如嵩洛浮秋光  
我從公遊如一日不覺青山映黃髮為畫龍門入節灘  
待向伊川買泉石

次韻子瞻題郭熙畫秋山

黃山谷

黃州逐客未賜環江南江北飽看山玉堂卧對郭熙畫  
發興已在青林間郭熙官畫但荒遠短紙曲折開秋晚  
江村煙外雨脚明歸雁行邊餘疊巘坐思黃柑洞庭霜  
恨身不如雁隨陽熙今頭白有眼力尚能弄筆映窻光  
畫取江南好風日慰此將老鏡中髮但熙肯畫寬作程  
五日十日一水石

題駒父家江千秋老圖

李商老

江風颭颭江水寒蘆洲雁下生微瀾漁翁夫婦不能語

津吏醉倒船著灘其旁病夫坐箕踞持竿萬事那復顧  
懸知寧斷嬌兒乳不斷冥鴻及飛鷺

與百順飯于文綿大光出宋漢傑畫秋山

陳去

非

焚香消午睡開畫逢秋山長安馬聲中有此四士閒離  
離南國樹閃閃湘水灣悠悠孤鳥去淡淡晨輝還屐上  
十年蠟未散腰腳頑不如一詣君坐此巖石間遠峰如  
修眉近峰如墮鬟書生飽作祟眼亂紛爛斑一笑遺世

人聊破千載顏詩成即畫記可益不可刪

觀秋江捕魚圖

汪彥章

霜飈落水瀟湘秋黃蘆颯颯秋江頭漁翁短櫂搖輕舟  
夕陽斜照寒波流蓬蓑箬笠興夷猶得魚沽酒更歡酬  
生涯一葉水上浮市朝利病不相謀青山綠水得漁遊  
此樂未必饒公侯畫圖急見清兩眸恍疑身在滄浪洲  
年來萍梗歎滯留擬欲與子為朋儔

早秋雨霽圖

崔德符



我離蜀山來赤日走東州奇峰作眼想一過神已留翩  
翩宋公子新詩藹風流丹青見新韻瀟灑出林丘依微  
萬里遙曠明一雨收高雲杳塞開縞日明華秋風裾映  
山青眇眇行李幽得非送將歸色有離別憂念我山海  
癖鍼砭不為瘳目看孤鴻飛心已麋鹿游吾兒能扶犁  
此憤便可投勿言尺寸許是中有菟裘

題唐希雅畫寒江圖

陳去非

江頭雲黃天醞雪樹枝慘慘凍欲折耐寒野鴨不知歸

猶向沙邊弄羽衣黃茅終日不自力影亂弱藻相因依  
唯有蒼石如卧虎不受陰晴與寒暑舟中過客莫敢侮  
閒伴長江了今古

頽臯楚山堂有秋景圖兩絕妙併賦此詩

僧慧

洪

一鷗低飛落平湖一鷗驚顧行炯如紅衣脫盡蓮蓬綠  
翠蓋凋殘荷柄枯更有數蓬癯已老無人折之欲傾倒  
水上殘紅空自好為誰點綴湖邊草

湖邊兩鴨自夫婦生而能言似相語嬾先浮波喜轉顧  
夫欲隨之竟先去水際青蘋各占叢風撼荷花已退紅  
不見清香雲錦段空餘霜葉伴枯蓬

聲畫集卷三

欽定四庫全書

聲畫集卷四

宋 孫紹遠 編

山水

奉先劉少府新畫山水障歌

杜子美

堂上不合生楓樹怪底江山起煙霧聞君掃却赤縣圖  
乘興遣畫滄洲趣畫師亦無數好手不可遇對此融心  
神知君重毫素豈但祁岳與鄭虔筆跡遠過揚契丹得

非玄圃裂無乃瀟湘翻悄然坐我天姥下耳邊已似聞  
清猿反思前夜風雨急乃是蒲城鬼神入元氣淋漓障  
猶濕真宰上訴天應泣野亭春還雜花遠漁翁暝踏孤  
舟立滄浪水深青溟濶鼓岸側島秋毫末不見湘妃鼓  
瑟時至今斑竹臨江活劉侯天機精愛畫入骨髓自有  
兩兒郎揮灑亦莫比大兒聰明到能添老樹巔崖裏小  
兒心孔開貌得山僧及童子若耶溪雲門寺吾獨胡為  
在泥滓青鞋布襪從此始

戲題王宰畫山水圖歌

十日畫一水五日畫一石能事不受相促迫王宰始肯  
留真跡壯哉崑崙方壺圖挂君高堂之素壁巴陵洞庭  
日本東赤岸水與銀河通中有雲氣隨飛龍舟人漁子  
入浦淑山木盡亞洪濤風尤工遠勢古莫比咫尺應須  
論萬里焉得并州快剪刀剪取吳淞半江水

觀李固請司馬弟山水圖三首

簡易高人意匡牀竹火爐寒天留遠客碧海挂新圖雖

對連山好貪看絕島孤羣仙不愁思冉冉下蓬壺

方丈渾連水天台總映雲人間長見畫老去恨空聞范  
蠡舟偏小王喬鶴不羣此生隨萬物何路出塵氛

高浪垂翻屋崩崖欲壓牀野橋分子細沙岸繞微茫紅  
浸珊瑚短青懸薜荔長浮查並坐得仙老暫相將

當塗趙炎少府粉圖山水歌

李太白

峨眉高出西極天羅浮直與南溟連名工繹思揮彩筆  
驅山走海置眼前滿堂空翠如可掃赤城霞氣蒼梧煙



洞庭瀟湘意邈綿三江七澤情洄沿驚濤洶湧向何處  
孤舟一去迷歸年征帆不動亦不旋飄如隨風落天邊  
心搖目斷興難盡幾時可到三山巔西峰崢嶸噴流泉  
橫石蹙水波潺湲東崖合沓蔽輕霧深林雜樹空芊綿  
此中冥昧失晝夜隱几寂聽無鳴蟬長松之下列羽客  
對坐不語南昌仙南昌仙人趙夫子妙年歷落青雲士  
訟庭無事羅衆賓杳然如在丹青一作雷裏五色粉圖安  
足珍真山可以全吾身若待功成拂衣去武陵桃花笑

殺人

同族弟金城尉叔升一作卿燭照山水壁畫歌

高堂粉壁圖蓬瀛  
燭前一見滄洲清  
洪波洶湧山崢嶸  
皎若丹丘隔海望  
赤城光中乍喜嵐氣滅  
謂逢山陰晴  
後雪迴溪碧流寂  
無喧又如秦人月下窺  
桃源了然不覺清  
心魂祇將疊嶂鳴  
秋猿與君對此歡  
未歇放歌行吟達  
明發却顧海客揚  
雲帆便欲因之向  
溟渤

題畫水障

張子壽

心累猶不盡果為外物牽偶因耳目好復假丹青妍賞  
抱野間意而迫區中緣塵事固已矣秉意終不遷良工  
適我願妙筆揮巖泉變化合羣有高深侔自然置陳北  
堂上做像南山前靜無戶庭出行已茲地偏萱草憂可  
樹合歡忿亦蠲所因本微物況乃憑幽筌言象會自泯  
意色聊相宣對玩有佳趣使我心眇綿

觀于舍人壁畫山水

王季友

野人宿在人家少朝見此山謂山曉半壁仍棲嶺上雲

開簾放出湖中鳥獨坐長松是阿誰再三招手起來遲  
于公大笑向予說小弟丹青能爾為

題山水障歌

蕭翼

高僧空室畫山水描畫江山千萬里青松鬱鬱鎮含煙  
瑞雲片片聯聯起萬仞千岑注碧泉落落不聞流水喧  
洞裏桃花秋不折三冬紅葉色長鮮白鶴灘頭勢欲飛  
燕來舊處不曾移借問巖前採樵客共語無言知是誰  
庭前日日花新好今春不換去年草適覩漁翁坐釣臺

看來不改容顏老

題觀山水障歌

江為

適來一觀山水障萬里江山在其上遠近猶如二月春  
咫尺分成百般像一巖差我入雲際七賢鎮在青松裏  
潭水泓澄不見波孤帆滉漾張風勢釣魚老翁無伴侶  
孑然此地經寒暑灘頭坐久鬢絲垂手執漁竿不曾舉  
樹婀娜山崔嵬片雲似去又不去雙鶴如飛又不飛良  
工巧匠多分布筆頭寫出江山路垂柳風吹不動條樵

人負重難移步

題觀畫山水障歌

吳融

良工善得丹青理，獨向茆茨畫山水。  
地角移來方寸間，天涯寫在筆鋒裏。  
日不落兮月長生，雲片片兮水泠泠。  
經年蝴蝶不飛去，累歲桃花結不成。  
一片石數株松遠，又淡近又濃，不出門庭三五步。  
觀盡江山萬萬重。

燕侍郎山水圖

王介甫

往時濯足瀟湘浦，獨上九疑尋二女。  
蒼梧之野煙漠漠。

斷壠連岡散平楚莫年傷心波浪阻不意畫中能更覩  
燕公侍書燕王府王求一筆終不與奏論讞死悞當赦  
全活至今何可數仁人義士埋黃土只有粉墨歸囊楮

觀王原叔山水圖

梅聖俞

石蒼蒼連峭峰火山嵯峨雲霧中老松瘦樹無筆踪巧  
奪造化何能窮古絹脆裂再黏縫氣象一出高衡蒿上  
有荆浩字持歸朝林公願換廷珪一丸墨誰言賣錢須  
青銅范寬到老學未足李成但得平遠工黃金白璧未

為寶丈人師臣無不通

王晉卿作煙江疊嶂圖僕賦詩十四韻晉卿和之語特奇麗因復次韻不獨紀其詩畫之美亦為道其出處契闊之故而終之以不忘在莒之戒亦朋友忠愛之義也

蘇子瞻

山中舉頭望日邊長安不見空雲煙歸來長安望山上時移事改應潛然管絃去盡賓客散惟有馬埒編金泉渥洼固自千里足要飽風雪輕山川屈居華屋啖棗脯



十年俯仰龍旂前却因瘦病出奇骨鹽車之厄寧非天  
風流文采磨不盡水墨自與詩爭妍畫山何必山中人  
田歌自古非知田鄭虔三絕君有二筆勢挽回三百年  
欲將巖谷亂窈窕眉峰修嫵誇連娟人間何有春一夢  
此身將老蠶三眠山中幽絕不可久要作平地家居仙  
能令水石長在眼非君好我當誰緣願君終不忘在莒  
樂時更賦囚山篇

柳子厚有  
囚山賦

書王定國所藏王晉卿畫煙江疊嶂圖

江上愁心千疊山浮空積翠如雲煙山耶雲耶遠莫知  
煙空雲散山依然但見兩崖蒼蒼暗絕谷中有百道飛  
來泉縈林絡石隱復見下赴谷口為奔川川平山開林  
麓斷小橋野店依山前行人稍度喬木外漁舟一葉江  
吞天使君何從得此本點綴毫末分清妍不知人間何  
處有此境徑欲往置二頃田君不見武昌樊口幽絕處  
東坡先生留五年春風搖江天漠漠暮雲卷雨山娟娟  
丹楓翻鴉伴水宿長松落雪驚醉眠桃花流水在人世

武陵豈必皆神仙江山清空我塵土雖有去路尋無緣  
還君此畫三歎息山中故人應有招我歸來篇

次韻子由書王晉卿畫山水

誤點故教同子敬雜篇真欲擬湯休壠雲寄我山中信  
雪月追君溪上舟會看飛仙虎頭篋却來顛倒拾遺裘  
王孫辨作玄真子細雨斜風不濕鷗

此境眼前聊妄想幾人林下是真休我今心似一潭月  
君已身如萬斛舟看畫題詩雙鶴鬢歸田送老一羊裘

明年兼與士龍去萬頃蒼波沒兩鷗

次韻子由書王晉卿畫山水二首

老去君空見畫夢中我亦曾遊桃花縱落誰見水到人  
間湫流

山人昔與雲俱出俗駕今隨去不回賴我胸中有佳趣  
一尊時對畫圖開

李思訓畫長江絕島圖

山蒼蒼江茫茫大孤小孤江中央崖崩路絕猿鳥去惟

有喬木攬天長客舟何處來  
櫂歌中流聲抑揚沙平風  
軟望不到孤山久與船低昂  
峩峩兩煙鬟曉鏡開新妝  
舟中賈客莫謾狂小姑前年嫁彭郎

書王定國所藏王晉卿畫著色山二首

白髮四老人何曾在商顏  
煩君紙上影照我胸中山  
中亦何有木老土石頑  
正賴天日光澗谷紛爛斑  
我心空無物斯文何足關  
君看古井水萬象自往還

君歸嶺北初逢雪我亦江南五見春  
寄語風流王武子

三人俱是識山人

王晉卿所藏著色山二首

縹緲營丘水墨仙  
浮空出沒無間爾  
來一變風流盡  
誰見將軍著色山

牽確何人似退之意  
行無路欲從誰宿  
雲解駁晨光漏  
獨見山紅澗碧時

李頎秀才善畫山  
以兩軸見寄仍有詩次韻答之

平生自是箇中人欲向漁舟便寫真詩句對君難出手  
雲泉勸我早抽身年來白髮驚秋速長恐青山與世新  
從此北歸休悵望囊中收得武陵春

題王詵都尉畫山水橫卷三首

蘇子由

摩詰本詞客亦自名畫師平生出入輞川上鳥飛魚泳  
嫌人知山光盎盎著眉睫水聲活活流肝脾行吟坐詠  
皆自見飄然不作世俗辭高情不盡落縑素連峰絕澗  
開重帷百年流落存一二錦囊玉軸酬不訾誰令食肉

貴公子不學祖父驅熊羆細檀淨几讀文史落筆璀璨  
傳新詩青山長江豈君事一揮水墨光淋漓手中五尺  
小橫卷天末萬里分毫釐誦官南出正均穎此心通達  
無不之歸來纏裹任紆綺天馬性在終難羈人言摩詰  
是前世欲比顧老疑不癡栢公崔公不可與但可與我  
寬衰遲

憐君將帥雖有種多君智慧初無師篇章後發已可駭  
丹青妙絕當誰知自言五色苦亂目況乃旨酒長傷脾



手狂但可時弄筆口病未免多微辭歌鐘一散任池館  
幅巾靜坐空書帷偶從禪老得真趣此身不足非則訾  
世間翻覆岨為谷猛獸相食虎與羆逝將得意比春夢  
獨取妙語傳清詩眼看官釀瀉酥酪未與村酒分醇醪  
解鞍駿馬空伏櫪寄書黃狗閑生釐江山平日偶有得  
不自圖寫渾忘之臨窗展卷聊自適盤礴豈復冠裳羈  
欲乘漁艇發吾興願入野寺嗟兒癡行纏布襪雖已具  
山中父老應嫌遲

我昔得罪遷南夷性命頃刻存篙師風吹波蕩到官舍

號呼誰復相聞知小園畜蟻防橘蠹

橘性甘多蠹南人畜蟻園中蟻緣木

食蠹雖隣家柯葉相接而蟻不相過亦一異耳

空庭春風收蜜脾讀書一生空

自笑賣鹽竟日那復辭城中清溪可灌漱城上連峰堪

幕帷十千薄俸聊足用魚多米賤憂無訾東坡居士最

岑寂岌然深叢見孤羆坐隅止鵬偶成賦槃中食藟時

作詩憐君富貴可炙手一時出走羞啜醪澤旁憔悴凡

幾歲胸中芥蒂無一釐江山別來今久矣不獨能言能

畫之同朝執手不容久笑我野馬初受羈袖中短卷墨  
猶濕旁人笑指吾儕癡方求農圃救貧病他年未用譏  
樊遲

畫學董生畫山水屏風

承平百事足鴻都無不有策牘試篆隸丹青寫飛走紛  
然四方集狐兔萃林藪何人知無益長嘯呼鷹狗奔逃  
走城邑驚顧念餬口素屏開白雲稱我茅簷陋濡毫願  
揮灑峰巒映巖竇巨石連地軸飛布瀉天漏縈山一徑

通過水微橋覆山家煙火然遠寺晨鐘叩僧從何方來  
行速午齋後有客呼渡船隔水惟病叟忻然發一笑此  
處定真否人生初偶然與此誰夭壽厄窮妄自憐一醉  
輒日富客至亦茫然邀我沽斗酒

題王詵都尉設色山卷後

還君橫卷空長歎問我何年便退休欲借嵒阿著茅屋  
還當溪口泊漁舟經心蜀道雲生足上馬胡天雪滿裘  
萬里還朝徑歸去江湖浩蕩一輕鷗

荅王道濟寺丞觀許道寧山水圖

黃山谷

往逢醉許在長安  
蠻溪大硯磨松煙  
忽呼絹素翻硯水  
久不下筆或經年  
異時踏門闥白首  
巾冠敝斜更索酒  
舉杯意氣欲翻盆  
倒卧虛樽將八九  
醉拈枯筆墨淋浪  
勢若山崩不停手  
數尺江山萬里遙  
滿堂風物冷蕭蕭  
山僧歸寺童子後  
漁伯欲渡行人招  
先君笑指溪上宅  
鸕鷀白鷺如相識  
許生再拜謝不能  
元是天機非筆力  
自言年少眼明時  
手揮八幅錦江絲  
贈行卷送張京兆

心知李成是我師張公身逐銘旌去流落不知今主誰  
大梁畫肆閱水墨我君槃礴忘揖客蛛絲煤尾意昏昏  
幾年風動人家壁雨雪泚泚滿寺庭四圖冷落讓丹青  
笑訕四翁十萬錢卷付騎奴市盡傾王丞來觀皆失席  
指點如見初畫日四時風物入句圖信知君家有摩詰  
我持此圖二十年眼見綠髮皆華顛許生縮手入黃泉  
衆史弄筆摩青天君家枯松出老瞿風煙枯枝倚崩石  
蠹穿風物君愛惜不誣方將有人識

正本有二篇互有不同故兼載之

荅王道濟寺丞觀許道寧山水圖

往逢醉許在長安  
蠻溪大硯磨松煙  
忽呼絹素翻硯水  
久不下筆或經年  
一日踏門撼門鈕  
巾帽敝斜猶索酒  
舉杯意氣欲翻盆  
倒卧虛樽將八九  
醉拈枯筆嘗墨色  
勢若山崩不停手  
數尺江山萬里遙  
滿堂風物冷蕭蕭  
山僧歸寺童子後  
漁伯欲渡行人招  
先君笑指溪上宅  
鷓鴣白鷺如相識  
許生再拜謝不能  
乃是天機非筆力  
自陳精力初未衰  
八幅生絹作四時  
早師李成最得意

什襲自藏人已知貴人取去棄牆角流落幾姓今知誰  
大梁畫肆閱水墨四圖宛然當物色自言早過許史門  
常賣一聲償然得雨雪泠泠滿寺庭四圖冷落讓丹青  
往來睥睨誰比數十萬訓之觀者驚客還次第閱春夏  
坐見歲序寒崢嶸王丞來觀歎唧唧亦如我昔初見曰  
新詩雌黃初得實信知君家有摩詰我持此圖二十年  
眼見綠髮皆華顛許生縮手入黃泉衆史弄筆摩青天  
君家枯松出老瞿頗似破屏有骨骼一時所棄願愛惜



不誣方將有人識

題花光畫山水

花光寺下對雲沙  
欲把輕舟小釣車  
更看道人煙雨筆  
亂峰深處是吾家

題郭熙山水扇

郭熙雖老眼猶明  
便面江山取意成  
一段風煙且千里  
解如明月逐人行

山水屏

曾子固

天縑落寒機舒卷光亂目秋刀剪新屏尺寸隨折曲搜  
羅得珍匠徙倚思先屬經營頃刻內千里在一幅定眎  
乃漸通紀一作悉數難迫促山亂若無窮負抱頗重複高

稜最當中桀大勢尤獨回環衆峰接趣向若奔伏矜雄  
誇九州爭險推星宿深疑雪霜積暗覺烟霧觸泉源出  
青冥漲潦兩崖束歷遠始紆徐派別輸衆谷輕舟漾其  
間沿汭無緩速微尋得修逕側起破蒼麓遠到無限極  
窮升犯雲族游子定何之顧盼停馬足盤石長自閑空

源偶誰築塵氛見荒村物色存古俗粲粲弄幽花蒼蒼  
蔭嘉木遺牛上崑顛驚塵出槎腹鮮明極萬狀指似才  
一粟雖從人力為頗類陰怪續深堂得欹眠高枕生遠  
矚餘光耀衾幃清意凝幔褥愚訶世幸略慵卧嗜尤酷  
因能助佳夢肯顧躋杲旭將相有時材溪巖真我欲儒  
林恥未博俗甯思自贖婚嫁累苟輕畊釣吾已卜圖屏  
持自慰寤寐心逐逐

山水屏

劉叔輅

吾家古屏來江南白晝水墨清煙嵐我行北方未嘗見  
衆道巫峽仍湘潭山頭老樹長參天水上衰公撐釣船  
青蓑擁身稚子眠得魚不賣心悠然久嫌時世趣向狹  
頗思種藥依林泉桃源仙家不可到但願屏上山水置  
眼前

和李公擇題相國寺壞壁山水歌

蒼山本是千萬丈怪爾斷落盈尺中枯松挂巖正矯矯  
白雲出谷方溶溶憶昨高秋十日雨百川湧溢騰蛟龍

丹青壞却不可駐金碧拂地都成空人間流落萬餘一  
掇拾補綴幾無從當時畫手合衆妙得此誠是第一工  
松陰行人何草草禿幘小蓋馬色驄長途未竟不得息  
嘯歌正爾來悲風巨靈擘華疏黃河夸娥移山開漢東  
海波芥子互出沒大雄遊戲神與通我今與君未嘗覺  
指視壁畫將無同新詩飄飄脫俗格得閒會復來從容  
晁無咎畫山水扇

陳無已

前身

一作生

阮始平今代王摩詰偃屈蓋代氣萬里入方

尺朽老詩作妙險絕天與力君不見杜陵老翁語湘娥  
增悲真宰泣

酬李唐臣贈山水短軸

李為刑曹杜君章知賞

晁無咎

大山宮小山霍欲識山高觀石脚大波為瀾小波為淪  
欲知水深觀水津營丘於此意獨親杜侯所與復有人  
不見李侯今五載苦向營丘有餘態齊紈如雲吳刀裁  
小毫束筍縑囊間經營初似雲煙合揮灑忽如風雨來  
蒼梧泱泱天無日深巖老樹洪濤入榛林閭漠狷狃寒

苔蘚浸淫螺蚌濕紛紛禽散江干沙有風北來吹蕙葭  
前洲後渚相隨沒行子漁人歸徑失李侯此筆良已奇  
我聞李侯家朔垂跨河而北寧有之曷不南遊觀禹穴  
梅梁鎖澀萍滿皮神物變化當若斯元君畫史雖天與  
我論絕藝無今古張顛草書要劍舞得意可無山水助  
它日李侯人益慕

自畫山水留春堂大屏題其上

胸中正可吞雲夢盍裏何妨對聖賢有意清秋入衡霍

為君無盡寫江天

自畫山水寄無斁題其上

湘吳昔窮覽懷抱自難忘  
毫素開塵牖江山入草堂  
寄君花縣裏虛我竹林旁  
何物酬斯贈清詩要一囊

觀燕公山水畫後有王荊公題詩

蔡持正

相君開卷憶江東  
髣髴鍾山與此同  
今日還為一居士  
脩然身在畫圖中

成生山水畫歌

徐師川



畫水不畫濕畫山不畫堅盈尺之紙數寸管便有江湖  
萬里天成生貌古心亦古造化為工筆端取玄冬起雷  
夏造冰翻手為雲覆手雨嶺外荒山與野水自昔不聞  
傳畫史只畫瀟湘與洞庭于今却在兵戈裏翠峰碧嶂  
鬱然來病眼愁心次第開人家浦溆扁舟渡何日真能  
到一回

次韻可師題于逢辰畫山水二首

江漢踰千里陰晴自一川故山黃葉下夢境白鷗前巫



峽常雲雨香爐舊紫煙布帆無恙在速上泛湖船

席上浮三楚毫端會百川名今大年亞意古惠崇前竟  
日對秋色無時散暝煙知君不浪語一眼認歸船

單老畫樹石山水歌

老樹筆間生竒石筆下出濃淡高低遠近山陰晴朝暮  
煙雲沒漠漠江天杳杳空不勞施力自然中便於沙際  
尋歸路却怪霜林葉不紅

題胡潛風雨山水圖

洪龜父

胡生好山水煙雨山更好鴻鴈書遠空馬牛風塞草

山水圖歌

呂居仁

君不見南江老龍夜不眠令我破屋開青天千巖倒壁  
卷角上一榻却在洪濤前又不見江頭古木百尺圍猓  
猓接手懸高枝雨中寒蘆披靡去天際風帆先後歸陳  
生故是可憐人筆雖未到心已親南村北村渴欲死怪  
此一室無纖塵鄭虔初岳不解奇韓幹畫馬空多肥萬  
里咫尺君得之更看湘江雷雨垂

陳生欲畫  
湖湘圖

山水圖

君家茅屋低蓬蒿客來頗厭蛙蚓號何得有此山突兀  
氣壓太華陵蒿蒿坐看遠澗受懸瀑似聽跬步鳴秋濤  
槎牙老樹半枯死上倚絕壁緣飛猱我行日畏盜賊逼  
敢厭瘴癘同腥臊偶逢坐穩嬾歸去豁達眼界無纖毫  
嶺南山水固多異恨無中州清淑氣對君圖障心恍然  
便如一作似太華蒿蒿前君但對此能高眠當有好句令  
君傳

王摩詰四時山水圖

謝幼槃

欲知摩詰詩中畫桃紅柳綠皆摹寫更含宿雨帶春煙  
一段風光生筆下欲觀摩詰畫中詩小幅短短作四時  
山平水遠含變態是有句無人知此公盤礴萬物表  
胸中炯炯秋空曉戲磨澹墨汗絹素世上丹青擅場少  
何人乞與輞川圖裝成小軸四時俱壁間仍題六字句  
人言雙絕古今無

題古畫山水障子

時年六歲

劉叔贛

應是塵外境不隨陵谷遷江山猶舊日松柏又千年

題王晉卿所藏鄭虔著色山水圖

曾子開

曾訪江南鳥爪仙悞隨塵網落人間紅泉碧澗春風裏  
尚記麻源谷口山

蔡師直畫山水研屏二首

謝幼槃

畫翁元勝斲輪扁喻子丹青如有神平遠還堪助詩思  
故疑摩詰是前身

淡墨江山作小屏碧紗煙裏護寒泓蟾蜍寫盡看倒影

身在山陰佳處行

觀蔡規畫山水圖

謝無逸

蔡生老江南山水涵眼界揮灑若無心  
筆端生萬怪樹杪聳煙鬟雲端懸縞帶  
繫舟枯柳根茅屋臨清派掃壁挂高堂  
肅肅起清籟君名定不朽第恐縑素敗

從人覓山水扇二首

饒德操

少壯崎嶇山水間短衣楚製略勝寒  
年來疲病歸期愆只乞君家便面看

愛君才氣恥言兵欲倚詩書繼老成手裏林泉當付我  
恐妨抽板揖公卿

寄蘇州徐處士弁弁能畫山水

陶商翁

平南無策鬢如霜七十峰前舊隱鄉  
相約祝融孤頂上借君吟筆畫瀟湘

李成山水

王履道

五日十日一水石此言雖工蓋其跡請看天地開闢初  
豈鑄日魂鎔月魄忽然而成隨所遇衲護風雲元滿肚



吐為千偈口瀾翻遊戲法中同一趣李侯落筆風煙起  
妙處欲回真宰意扁舟不動水黏天落日孤明山若倚  
斷猿吟挂青楓林澗松倒卧長十尋白鷗似作終老計  
浮雲知自何年陰由來神品完天力一抹江流吞萬蹟  
寸量尺度但形摹畫吏如山爾何得貴人費盡千黃金  
寶奩玉軸誰敢爭一聲常賣落公手世間得喪誰虧盈  
我生懶率便踈放只有幼與巖石相它時真作畫中人  
倘辱書來問無恙

題趙大年金碧山水圖

王孫胸中楚七澤不學庸史誇水墨試開緹襲拂珠絲  
半幅鴛鴦射金碧余聞女媧鍊石補天缺石破壓天天  
柱折五色墮地金嵯峨六鰲跨海吹銀波扶桑玉虹下  
天半貝闕珠宮紫雲滿桃花笑作十洲春劉郎此地聞  
雞犬繫我不從天津槎自閱妙畫徒驚嗟迷魂一夜飛  
蝴蝶覺來半破蓬窗月

文湖州作山水橫軸吳希全家藏其子誠伯求

蘇養直賦詩語特奇妙遂用其韻同賦 林子來

明窗十日復五日出此湖光與山色前身畫師語不妄  
文侯乃是金門客乍從雲際辨遠岫爭數喬林誇眼力  
沒漂菰米歲事空水濱柱下南飛鴻欲投曉渡喚舟子  
急漿已入昏煙中徑思天邊問歸路錯認江鄉舊洲渚  
能傳萬里在尺素豪奪應防卷寒雨

次吳伯江所藏文湖州山水韻 僧祖可

乘空作山川妙絕借墨色曲折千里素幅間來自吳興

白蘋客乃知瀟湘洞庭岸平吞胸中寄筆力清霜搖落  
江海空如聞冥冥度驚鴻重樓複閣底處所使我絕欲  
空濛中吳侯吳侯安用許浪迫歸心赴脩渚如何喚得  
江上船一卧蒼波占煙雨

題余秀才所藏江參山水橫軸畫二首

陳去非

卷中衮衮溪山去筆下明明開闢初不肯一禪為婦計  
余郎作意未全疎

萬壑分煙高復低人家隨處有柴扉此中只欠陳居士

千仞岡頭一振衣

謝曹中甫惠著色山水抹胸

陳子高

曹郎富天巧發思綺紉間規模寶月團淺淡分眉山丹  
青綴錦樹金碧羅煙鬟爐峰香自湧楚雲杳難攀政宜  
林下風妙想非人寰飄蕭河官步羅抹陵九關我家老  
孟光刻畫非妖嬈繡鳳褐顛倒錦鯨棄榛菅忍將漫汗  
澤敗此修連娟絨藏寄書篆曉夢生瀾斑

題趙宜興萬里江山圖

慘淡何人畫飄飄萬里心雲輕春樹暗日落暮江深細酌淵明酒仍彈子賤琴知公湖海氣對此益駸駸

與叔易過石佛看宋大夫畫山水

崔正言

霜落石林江氣清隔江猶見暮山橫箇中只欠崔夫子滿帽秋風信馬行

書余逢時所作山水

僧祖可

江勢卷十萬頃村墅掩三四家落雁驚橫煙水小舟歌著寒沙

折葦非關秋色飛鷗元自斜行坐上忽驚丘壑窗間那  
有瀟湘

書余逢時所作山水

江南江北岸飽歷此山川誰信著筆力盡驅來眼前野  
橋分道路古木薄風煙我欲徑歸去沙頭人挽船

觀燕肅山水

僧崇實

憶昨神林口江山此畫同沙鷗輕泛浪浦樹遠含風一  
舸菰蒲外數峰煙雨中箇中誰得計蓑笠釣魚翁

次韻子瞻題郭熙平遠二絕

蘇子由

亂山無盡水無邊  
田舍漁家共一川  
行遍江南識天巧  
臨窗開卷兩茫然

斷雲斜日不勝秋  
付與騷人滿目愁  
父老如今亦寸思  
一蓑風雨釣槎頭

題工部文侍郎周翰郭熙平遠二首

晁無咎

漁村半落楚江邊  
林外秋原雨外天  
誰倚竹樓邀大舫  
天涯暮色已蒼然



洞庭木落萬波秋說與南人亦自愁  
欲指吳松何處是一行征雁海山頭

題趙承遠所藏大年畫平遠一首

潘邠老

吳頭楚尾散花洲木脫波生一夜秋  
想得筆端鳬雁足又添鸕鷀起沙頭

大年流水繞孤村圖

陳子高

少游一覺揚州夢自作清歌與寫成  
流水寒鷗總堪畫細看疑有斷腸聲

表凡丁行之俾予作山水一軸 王子思

禿髮管城書不中射煤滿硯隨輕濃煙雲變怪本無定  
丹青故匪能形容解衣盤礴無人久妙跡於今復何有  
揮毫要使真宰泣歎息初非癡絕手遼東有人丁令威  
去家得仙今暫歸上界繁華異丘壑安得長林大麓長  
追隨聯翩大軸要予寫鼓冰不在鵝溪下吾既不能為  
喬松直榦摩蒼天又不能為小童一線飛紙鳶萬里江  
山入平遠喚取畫師閭立本

江侯邀予作山水書以贈之

江侯樂山水誓卜山水居遊戲天目道箬帽跨蹇驢村  
童習識之拍手笑且呼行行不知顧心與山水俱于茲  
且幾年所得應有餘云胡不知厭要予寫諸圖昔者少  
壯日戲墨謾妻奴今衰眼目暗筆硯久已疎書來不得  
謝督迫疇敢徐圖成不自識濃淡恣所如雲深霧莫測  
中恐藏於菟人生孰非幻作觀隨有無江侯樂山水何  
考其真歟作詩調江侯江侯其曉諸觀畢勿遽棄醬瓿

尚可糊

何源秀才為予畫山水圖覓詩

孤峰特立何巉巖勢與霄漢高相參左蟠右列分嶺岫  
儼若至尊朝子男怪予蝸室不盈丈欲有異境起塵凡  
素縑挂壁故妥帖平地作此千嵌巖雲蒸霧結深莫測  
長林大麓亂不芟想當變怪蟄龍虎中有窟穴誰能探  
將崩未崩江動石欲去不去風滿帆山坳林闕見天際  
隱約萬里橫煙嵐嗟予質性素山野視此丘壑心益耽

斗升之粟真秣莖野馬垂耳就轡銜西山爽氣日在望  
吏卒侍側嚴若監青鞋布襪棄不著誰令自苦披青衫  
頗羞漁父駐短櫂似笑大夫新被讒寄言鳥獸倘可侶  
吾將從汝棲林巒

荅陳五進士遺山水枕屏


梅聖俞

妙畫能成趣谿山迥得君漁舟長映浦巖樹半藏雲征  
鳥無時沒橫橋有處分數峰來枕席曾不愧移文

題趙侯畫滄江遠岫圖

周少隱

公子風流絕代無名高當與大梁俱自從剪得吳江水  
不愛滕王蛺蝶圖



聲畫集卷四